

EUSKARA. Udalean egitasmoa aplikatzeko garaian Azpeitia «bide erakusle eta bidegile» izango da

Estreinakoz Azpeitian aplikatuko da Euskara Biziberritzeko Plan Nagusia

‘Euskara, gu geu gara bidea’ kanpaina jarri dute martxan erakunde eta herritarren artean atxikimenduak jasotzeko

Mikel Arrieta | **AZPEITIA**

Euskara Biziberritzeko Plan Nagusia (EBPN) herri mailan Azpeitian (Gipuzkoa) aplikatuko da estreinako aldiz. Bertako udalak *Euskara, gu geu gara bidea* kanpaina prestatu du planaren abiapuntu gisa.

«Azpeitian euskararen aldeko ahalik eta atxikimendu gehien edota babes zabalena lortzea» da kanpainaren helburua Patxi Saez Belokik, Azpeitiko Euskara Patronatuko Zuzendariak, atzo aurkezpenean esan zuenez. Datorren astean herriko erakunde, elkarte eta enpreetan (guztira 800 bat) kanpaina aurkeztuko dute ahalik eta babes handiena lortzeko; abenduaren 2an, igandea, Udaletxeko arkupetan sinadura bilteta prestatu dute, «euskararen alde dagoen eta Azpeitiko gizarte bizitzan parte hartzen duen ororen» sinadura biltzeko. Sinatzaileek agiri bana jasoko dute eta gero ekimenean parte hartuko duten guztien izenarekin liburuxka bat argitaratuko da.

Eusko Legebiltzarrak 1999ko abenduan onartu zuen Euskara

Biziberritzeko Plan Nagusia. 2000. urtean Euskararen Aholku Batzordea plan nagusi hori udaletan aplikatzeko prestatu zuen eta aurtengo apirilean aur-

keztu zitzaizen Araba, Bizkaia eta Gipuzkoako herrietako ordezkariak. Azpeitia izan da plana martxan jartzea erabaki duen lehen herria. «Azpeitia

10.000 biztanletik gorako herrien artean batez beste euskaldun gehien dituen herria da. Horixe izan da, hain zuzen, Euskara Biziberritzeko Plan Nagu-

sia Azpeitian abiarazteko arrazoia. Izan ere, Azpeitiak duen egoera soziolinguistikoa dela eta euskararen normalizazioa izango duen abiapuntua Euskal Herriko beste edozein herritan baino hobea da. Azpeitia, beraz, ondorengo urteetan euskararen normalizazioaren bidean, bide erakusle eta bidegile bihurtuko da», esan zuen atzo Patxi Saez Belokik.

Nahi duenari euskaraz bizitzeko aukera eman

Euskara Biziberritzeko Plan Nagusian helburu orokor bat jasotzen da: «Euskaraz bizi nahi duten herritarrei horretarako aukerak eskaintzeko behar diren hizkuntza-politikako neurriak erabakitzea eta bultzatzea; maila pertsonalean, sozialean eta ofizialean, euskararen berreskurapen osoa lortzeko euskararen aldeko urratsak areagotuz».

Helburu estrategikoak, berriz, hiru dira: «Euskara, belaunez belaun eta etenik gabe ondorengoetaratzeko; euskararen erabilera esparru guztietan segurtatzeko; eta hizkuntzaren kalitatea bermatzeko».



EGUNKARIA
Patxi Saez Beloki Euskara Patronatuko zuzendaria eta Iñaki Etxezarreta zinegotzia, atzoko aurkezpenean.

Patxi Goenagaren zuzendaritzapean?

HIZKUNTZA POLITIKARAKO SAILBURUORDETZA. Patxi Goenaga EHUko irakasle eta Euskaltzaindiko idazkariari eskaini dio Miren Azkaratek Hizkuntza Politikarako Sailburuordetza

M.A. | **AZPEITIA**

Eusko Jaurlaritzako Hizkuntza Politikako Sailburuordetzako ordezkariak ez zen izan atzo Azpeitian egin zen aurkezpenean. Kultura Sailak emandako azalpenen arabera, Xabier Aizpurua, Hizkuntza Politikako sailburuorde eta azken urteetan Euskara Biziberritzeko Plana gidatzeko ardura izan duena, Santiagon (Galizia) dago, bertan egiten ari diren hizkuntza gutxituen inguruko kongresuan.

Beste irakurketa bat egin daiteke, ordea. Miren Azkarate Kultura sailburuak oraindik ez du definitu bere taldea. Euskadi Irratiak ostegunean aurreratu eta EGUNKARIAK konfirmatu ahal izan duenez, Patxi Goenaga

Euskal Herriko Unibertsitateko (EHU) irakasle eta Euskaltzaindiko idazkaria izango da, azken orduko ezustekorik ezean, Hizkuntza Politikako sailburuorde berria.

Eusko Jaurlaritzako Kultura Sailak ez zuen atzo albisteak baiezatu nahi izan, ezta ezeztatu ere. «Xabier Aizpurua Santiagon dago une honetan lanean, eta lanean jarraituko du», esan zioten bertako iturriek EGUNKARIARI.

Patxi Goenagaren ingurukoek ere ez zuten albisteak konfirmatu nahi izan. Konfirmatu dute ordea Patxi Goenagak «eskaintzaren bat» jaso duela Eusko Jaurlaritzako Kultura sailetik. Goenagak urte asko egin ditu Euskaltzaindian Miren Azkaratekin lanean.



IÑIGO AZKONA
Patxi Goenaga, Euskaltzaindiak irailean egin zuen Kongresuan.

Patxi Goenagari omenaldia egingo diote Azpeitian

Euskara Biziberritzeko Plan Nagusiaren abiapuntu gisa Azpeitian antolatu duten *Euskara, gu geu gara bidea* kanpainaren baitan, Patxi Goenagari omenaldi egingo dio Azpeitiko herriak; Patxi Goenaga eta Patxi Altuna omenduko dituzte, «euskaltzain azpeitiarrek euskararen alde egindako lana eskertzearen». Omenaldia abenduaren 2an, igandea, eguerdiko 12:00etan egingo da Azpeitiko udaletxean.

Egun horretan, Euskara Biziberritzeko Plan Nagusiaren alde sinadura bilteta egingo den eguna, Eusko Jaurlaritzako Kultura sailburua, Hizkuntza Politikarako sailburuordea eta Euskaltzaindiko ordezkariak daude iragarrita ekitaldian. Litekeena da Patxi Goenagak ordurako ordezkartza hirukoitza izatea: omendua, euskaltzaina eta Eusko Jaurlaritzako Hizkuntza Politikarako sailburuorde berria.